

碧城仙館詩鈔

二



叢書集成

初編

主編者
王雲五

商務印書館發行

王雲五主編

叢書集成初編

碧城仙館詩鈔
二冊

中華民國二十五年六月初版

撰者 陳文述

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

詩

碧城僊館詩鈔卷六

鸚鵡地圖

西洋地毯圖。載此地爲南極下野區。新同南墨利加火地。皆爲第五六州。曾有佛郎西舟。於大浪山望見有地。就之。惟平原漭蕩。入夜星火瀾漫。一方無人。但見鸚鵡。名曰鸚鵡地。

蟠虹溫帶縈天細。十洲異事誰能記。域中原有鳳皇山。海外新傳鸚鵡地。此地遙隣墨利加。龍宮寶氣孕金沙。西洋綫路寅針直。南斗珠星丙夜斜。狂濤不蝕三銖土。粼粼瑤碧凝懸圃。四照花開不見人。漫天匝地飛鸚鵡。仙島風和氣不寒。暖煙紅暈日華丹。啄餘香稻明珠碎。棲老瑤林玉蕊殘。雙襟染翠修翎碧。銜花鈎喙珊瑚赤。學語誰傳海上聲。凌雲不是中原翮。桂家娘子武仙郎。眷屬相依水一方。粉羽羣飛疑蛺蝶。綠衿比翼學鴛鴦。星火中宵映天漢。大浪山高橫赤嶼。何年舶趠佛郎西。扶桑以外曾親見。天海蒼茫事有無。廣輪曾見地毯圖。丹青珍重王孫意。重倩良工院體摹。蓮露花臺飛萬翼。海波倒射晴霞色。丹穴鸞雛自有家。烏衣燕子曾開國。披圖我意最相思。小錄夸堅信有之。記得南朝柳歸舜。游仙曾遇戴蟬兒。鬱華滿地真如此。此去中華知幾里。祇在圓羅一握中。盈盈尙隔千重水。我疑此地卽蓬萊。青鳥傳書定往來。日暮清玲瑤水碧。隨風還上紫瓊臺。不然竺國應相近。金經日誦參心印。六時奏樂散天花。妙音自和頻伽韻。君不見天寶當年樂事稀。呼名常伴玉真妃。畫枰劫散牙牀冷。香塚蘿蕪葬雪衣。又不見德壽

宮庭盛南渡。解纜曾許歸山去。中使前頭問上皇。離情黯澹錢塘樹。從來文采致樊籠。繡檻屏山閉後宮。爭似瀛洲西畔路。飛翔任意海天空。海碧天青飛自在。瑤精散暈生光彩。天上芙蓉別有城。人間星宿原通海。弱水西流去不還。芝英瑟瑟玉成田。一生不入黃金殿。莫向風前說隴山。樓臺倒影魚龍伏。欲泛仙槎路難卜。想見歸飛拍拍時。晚潮一片斜陽綠。小夢華胥記未真。雕欄間對綠朝雲。翦燈擬續陳思賦。誰是曾經滄海人。

繡詩行贈蔣青荃參軍

吳門三蔣今詩伯。青荃年少才無敵。錦心繡口筆生花。金臺吟徧無人識。酒酣偶賦憶春詩。便是人間絕妙詞。祇爲有情惜春色。更從無賴笑花枝。誰家嬌女顏如玉。繡牀常置然脂錄。新詩傳唱入紅閨。不厭停鍼百回讀。一幅烏絲一幅花。愛郎詩句最鮮華。直須隱語題黃絹。不羨名山護碧紗。吳綾細膩如霜雪。研螺自寫簪花格。繡出花枝兩句詩。迴文錦字無顏色。因知相賞出風塵。祇有才人與美人。名士本來稱繡虎。蛾眉真合號鍼神。碧城曾賦遊仙夢。白榆烏鵲閒吟諷。珍重閨中一片心。繡成當作蓮花供。內子曾繡余轉橋二語作樓上楹帖感君遭際話斜暉。似此憐才世亦稀。絕勝烏蠻金齒外。梅家詩句織弓衣。

憶春詞十首和青荃

茜紗牕子碧紗幮。紫玉芳年白玉膚。撲蜨自憐羅扇薄。調鸚閒愛畫闌扶。秦嘉詩句迴環讀。周昉丹青細膩摹。香逕煙銷人迹少。自攜鴉髻種文無。

雙鸞冶袖碧連環。約略風流見一斑。卯酒暈深添笑靨。午眠人倦。彈香鬢。懷中荳蔻封金合。江上蘼蕪憶玉顏。曾傍瑣牕窺曉鏡。細調螺子畫青山。梧子蓮儂。恨綺懷。消愁空有酒如淮。鷓鴣天遠啼紅袖。鸚鵡秋寒怨紫釵。雙鸞魂消。連理相餘。香夢憶合歡鞋。最憐鐘斷燈殘後。澹月扶花下玉階。風定簾波咽玉簫。啼鶯初歇酒初消。水仙舊約留金枕。侍女芳名喚綠翹。細碎三更梧葉雨。相思一夜藕花潮。迴腸繞徧揚州路。十二紅樓廿四橋。佩聲隱約隔重簾。別緒誰歌阿誰鹽。大好風光歸燕燕。有情眷屬讓鷓鴣。拋殘桐綠琴三尺。貼牋花黃鏡一奩。留得真珠兩行字。芳名小印桂紅鈐。玉篆罍恩綴網軒。青棠開落自黃昏。空留畫篋新吟卷。不浣春衫舊酒痕。眉語雙成遙入夢。臉波一寸儘消魂。桃花紅瘦斜陽影。惆悵重過舊日門。珠箔低垂護曉寒。泥人最是曲闌干。玉臺明鏡留雙影。團扇香羅寫合歡。秋帳燈花成獨照。春屏詩草怕重看。青天碧海迢迢夜。省識幽情此際難。舊遊咫尺杳難尋。詩滿罍恩月滿襟。香篆碧依吟榻靜。燭花紅照畫屏深。漫天雲雨纏綿意。方寸星河宛轉心。一曲冰絃響秋雪。鳳皇飛上落霞琴。傷春傷別總曾諳。心自玲瓏態自憨。皓齒艷歌花十八。明蛾澹寫月初三。不逢佳耦生何益。得遇同心死

亦甘愁絕。書樓天樣遠。牽牛西北。雀東南。
空江目斷。鯉魚槭。春恨春愁。次第。碧海三生證離合。
鳳銜自憊。情根除結習。名香風定。禮金函。紅樓一閉。隔仙凡。
屬柵祇許烏龍臥。玉佩休教紫。

長椿寺九蓮菩薩像

慈雲縹緲香霧遮。千佛繡徧紅袈裟。玲瓏妙鬘綰瓔珞。
前身九朶青蓮花。城南古刹長椿寺。曾是當年布
金地。東風吹我入招提。一龜閒話前朝事。前朝遺事說昭陵。
妙選深宮異色升。仙李蟠根滋湛露。芳蘭徵
兆毓前星。前星如月輝東斗。合向璇題署堯母。大號先頒皇貴妃。
小心祇事中宮后。敢忘先皇顧命辭。教
成聖德母兼師。關心東閣經筵日。嚴訓西城曲宴時。卷簾不肯干
朝政。政事都由相公定。四十餘年海宇
寧。外有江陵內慈聖。鄭妃擅寵過邯鄲。奪嫡陰謀漸有端。問到諫
臣何事謫。慈顏一怒國儲安。閒來慧業
參因果。結趺學向蓮臺坐。夢裏傳經悟宿因。貝多錄徧青綾裏。
參透天龍一指禪。世宗家法換求仙。翠冠
舞鳳宮粧卸。紫竹飛鸚妙諦宣。景命殿基臨瀟水。鍾祥人識銅龍里。
煌煌御筆紀穹碑。仁祠靈宇東西峙。
宮中隆德殿西隅。閒有菩提樹兩株。曾是慈寧親手植。黃花開落子
成珠。彌空花雨飛飄忽。妙相莊嚴輝
滿月。畫院何人善寫真。烟雲幻出丹青筆。外家恩寵武清侯。戚畹
班中第一流。聖孝推恩頒賜溥。卅年富
貴更無儔。閣臣密進籌邊策。借餉臣工先外戚。父子流離家業空。
賈帖零丁題賜宅。人天迢遞兩茫茫。菩薩慈悲亦自傷。彷彿空中還
示現。至今遺恨悼靈王。一代興亡如轉轂。麥飯蕭條悲社屋。劫灰消
盡佛無

靈蕭寺何年留玉軸。春雨依然長綠蕪。冬青寒食愴啼鳥。金銅寶塔成今昔。綠刺觀音尙有無。同人頂禮瞻遺像。過眼風燈各俯仰。玉題錦暉紀重裝。老輩題詩溯唐蔣。別有琳宮郊墅邊。天吳紫鳳象巍然。逕思同訪香雲閣。更爇胡香拜九蓮。

平谷弔金金花公主墓

房山石獸寢園荒。龍首蛾眉弔夕陽。遺塚至今悲紫玉。傾宮當日葬同昌。春山秋水消塵夢。粉碓脂田失故莊。欲補金源公主傳。羽衣何處問蟲娘。

翠鈿

義髻千絲密。柔鬟百寶裝。玲瓏釵鳳亞。掩映髻蟬涼。螺子消眉黛。鵝兒映額黃。翠翹遮一抹。華勝壓雙行。鬢影鬢髿麗。鬢雲隱約香。新興盤鬪掃。知是大家粧。

羅巾

蟠螭明似玉。一抹護羅巾。艷雪低圍頸。濃香散滿身。水紋明入畫。蘭氣膩生春。方領團花繡。蜚幟掩笑顰。淚痕翻尙見。粉漬染猶新。題與珍珠字。應憐絕世人。

宮袍

拂地宮袍艷。吹香乍捲幃。玲瓏雙玉珮。縹緲五銖衣。翠袖宜長短。金裙訝是非。纈翻魚子密。繡簇牡丹肥。裾襴疑神女。幟桂憶宓妃。銀貂粧更好。青海雪飛花。

繡屨

新月誠纖麗。圓趺亦可憐。吳宮留寶屨。樂府唱行纏。扶出亭亭玉。開成步步蓮。四分量鈿尺。杜牧之詩六寸束春妍。韓致堯詩上馬紅韉捷。凌波綠屨鮮。多情羨溫尉。解賦錦鞵篇。

香修詞爲嚴蕙楊作

香修姓張氏。初名秋月。幼媵於無錫嵇相國家。蕙楊娶於嵇。乃謀諸中閨。而胖合焉。且援十六觀經。戒香熏修之語。字之曰香修。華司馬秋槎。屠孝廉琴塢。爲寫秋江載月團扇貽之。蕙楊因以畫扇名齋。且遍乞題句。爲簪花集。

一江春水遠如天。舊約分明十載前。記向石鐘山下見。銷魂人在木蘭船。紅鸚籠外韻同圓。學誦唐詩日幾篇。解爲蛾眉寫秋怨。吳綾祇繡李青蓮。

香修愛誦太白美人捲珠簾絕句。

三五冰輪是小名。秋同消瘦月同明。一聲水調歌桃葉。自向江頭打槳迎。小影凌波欲避魚。水花香氣散明珠。錢塘畫史風流甚。替寫秋江載月圖。碧玉何曾是小家。青衣脫後更風華。妙香十種團環珞。身是西天稱意花。手寫華嚴懺性靈。玉臺香近畫紗櫺。連環小印綢繆字。紅上蓮花白氎經。垂鬢十八妙鬢雲。禪榻茶烟伴夕曛。身是維摩病居士。散花人作戒香熏。繡幙輕寒好護持。玉顏相對寫烏絲。衍波付與春江鯉。徧乞簪花集裏詩。

百萬工錢紫玉釵。定情詩卷續風懷。昨從碧浪湖邊過。本事新添畫扇齋。

雲神廟題壁

華鬢宮闕麗瑤京。小隊娥娥六甲名。四壁蛟龍寒有氣。中宵環珮靜無聲。乘風碧落颺輪遠。行雨青天絳節輕。歸去定知何處所。星娥月姊在層城。

送青荃之官浙江

一門羣從總能文。肯作微官倍惜君。手版隨人成薄宦。頭銜雅自愛參軍。聽鶯偶側烏紗帽。倚馬猶書白練裙。惆悵見遲成早別。春江花月憶吳雲。

同心香草惜芳蘭。蕭寺題襟墨未乾。論古不嫌詩律細。談兵方識將才難。春詞綺麗紅絲繡。別緒纏綿玉軫彈。珍重曉星殘月夜。袂衣莫厭護春寒。

小札留題障碧紗。尊前揮手卽天涯。無人東閣能延士。此去西湖正落花。吳下少年工跌宕。鄴侯弟子自風華。渺然羅襪凌波去。惜別沉吟到日斜。青荃留別余詩。有日斜羅襪凌波去。誰識青溪最小姑之句。

題楊荔裳方伯換西藏紀事詩後

方伯卓犖天人流。坤輿歷徧輕九州。籌邊祇今玉壘外。參軍憶昔青海頭。青海迢迢三萬里。分野天文符井鬼。吐蕃部落徧河湟。兩戒中分藏江水。藏江水碧澄玻璃。卑禾地界西南夷。班禪達賴彼所敬。琳宮直接河源西。本朝幅幘邁前古。國初早定遐方土。恭繹仁皇御製文。掃蕩邪魔仗神武。小醜無端肆陸梁。修

羅戈甲敢猖狂。祇聞劫火銷金地。不見天龍護法王。梵書呼救皇心怒。輪臺地重增兵戍。河魁玉帳出甘涼。上公秉鉞西征去。書劍從容絕域行。君時奉詔許隨征。暫辭粉署風流地。去聽金戈激盪聲。沙度繩行盡經歷。盾鼻磨冰晨草檄。北望伊犁有斷雲。茫茫一綫通戈壁。此地從來最苦寒。千年古雪玉龍蟠。怒江水惡皮船渡。熱索橋高鐵馬盤。月中刁斗聞傳箭。上將天威申七戰。有詔懷門許受降。捷書夜奏南薰殿。幾番慷慨看吳鉤。閱盡風霜老敵裘。一夜黃封馳驛騎。貂蟬真見出兜鍪。雪山崖石橫天半。大筆淋漓虹氣貫。寫到燕然第一功。古來多少英雄羨。我聞此地古西羌。贊普和親說李唐。九曲河西賜湯沐。金城愴別鳳池鄉。遺跡于今留大詔。當年楊柳空憑弔。揚得聯盟甥舅碑。奉春遺智真堪笑。亦有軍中休暇期。登臨投贈漫留題。憑將辛苦三年事。寫入蒼涼百首詩。馬蹄踏徧崑崙足。落日大旗聞鼓角。斷戈折戟未全消。戰績依稀說年岳。十曲黃人奏凱旋。金瓶從此靖西天。祇憐戰骨埋荒草。愁絕招魂路引篇。去從後藏歸前藏。中土西陲尙東望。戰地生還亦偶然。短衣孤劍偏神王。頻年秦蜀未休兵。君作屏藩在錦城。聞道紅旗催報捷。應銷金甲勸春耕。君家大謝才尤大。謂答雲農部吟詩愛學西崑派。也曾百戰障孤城。中朝人物應稱最。豪吟如此古無人。西望峨岷隔棧雲。當作金經資日誦。貝多葉寫佛香熏。

寄孫蓮水金陵並東淵如觀察

河樓一別總消魂。聞道君歸白下門。斜日烏啼江令宅。青山花落謝公墩。畫船倚醉春留影。官閣題襟夢有痕。惆悵西華殘月夜。客懷如水憶黃昏。

近來消息訝頻疏。恰得江南一紙書。寄我新詩託魚雁。知君遊蹟徧淮徐。天涯懷舊人難見。海內休兵事尙虛。更憶君家多冠客。出山心事問何如。

秣陵最是相思地。欲往從之願總賒。擬拜梅花詞客墓。便尋桃葉美人家。蘼蕪綠盡飛新燕。楊柳黃深啼乳鴉。安得六朝春色裏。與君攜手訪棲霞。

遊玉制軍園林贈紅蘭燕山兩公子

白石迴芳徑。銅鋪啓苑門。午橋斐令墅。甲第謝公墩。樹密疑無路。花明別有村。茫茫人海裏。清絕此名園。春水一渠活。輕冰暖易消。雨添青峽瀑。柳隱赤欄橋。沙淺鴛鴦穩。花深蛺蝶驕。定知纔滌筆。殘墨在芭蕉。西山橫萬疊。青到畫闌邊。及此重三節。來看尺五天。春陰瓊島暗。綠樹鳳城圓。古意登高寫。長風冷七絃。一品平泉石。停雲綠蔭堂。秋星明劍匣。春雨潤琴牀。聯舫低花幔。迴樓對苑牆。鳳城華月近。宮樹晚蒼蒼。一賦思公子。臨風玉樹新。文章花作骨。兄弟璧爲人。接翼如丹鳳。前身是石麟。西園賓客好。名士盡徐陳。簾外天如水。焚香讀賜書。克家披萬卷。經世惜三餘。月白閒庭靜。燈紅夜閣虛。漏沉河影直。詩興更何如。文武傳家學。空庭射圃開。成行傍榆柳。列障破莓苔。短草從禽去。長楸走馬回。金貂膺上賞。知爾不凡材。杜曲連韋曲。人知貴主家。黃封頒面藥。翠匣賜宮花。畫戟雙油幕。朱輪七寶車。尙書門第好。姻眷亦豪華。

燕山爲肅親王額駙。

八州仍作督。萬里倚長城。籌筆天邊疏。樓船海上兵。宸衷識韓范。世業在韋平。努力須年少。家聲貴令名。

題嬋娟錄

一名金箱蒼說。所載皆古今閨閣文字。金匱女士楊蕊淵所輯也。

麝粉銷黃不染塵。掃眉才子更無倫。然脂自續傷心史。展卷如逢絕世人。四壁琅函香在手。一牀斑管月隨身。簪花書格尤佳麗。半是曹娥半洛神。

反袂沉吟定幾回。傷心羅綺盡成灰。千秋怨耦還佳耦。一代仙才又鬼才。帝子可能金作屋。麗人真合玉爲臺。六宮哀怨三生事。都向蛾眉筆底來。

大有閒情絕妙詞。十行翠札寫烏絲。粧樓作記思張泌。畫燭修書笑宋祁。離合姻緣仙縹緲。人天眷屬佛慈悲。萬花堆裏開函讀。勝寫瑤清碧落碑。

半下紅簾擁碧紗。墨香銅雀譜芳華。春風楊柳南朝樹。夜雨菖蒲北里花。何處堪題金縷曲。此中便是玉鈎斜。徐陵才筆吾猶愧。乞序偏勞說大家。女士乞余作序。故云。

四川營是秦良玉屯兵處

虎坊橋北城南路。萬瓦魚鱗擁春樹。居人指點說前朝。曾是將軍駐兵處。將軍玉貌更無倫。南國蛾眉舊姓秦。幕府別開唐貴主。傳車爭迓洗夫人。家總州兵作宣撫。才大能文復能武。袖裏兵符八陣圖。威行溪峒諸蠻部。小隊鐃歌舊有聲。播州當日早從征。紅粧嬌嬾三千騎。白桿縱橫十萬兵。徵兵萬里援遼左。驛

路東來嚴堠。火寶劍腰橫。白玉鞘。戰袍甲絡黃金鑠。水急渾河白浪迴。桃花馬上繡旗來。冬衣恩重殘兵泣。夜月魂歸戰骨哀。榆關葉落霜飛野。行軍誰似將軍者。能表忠臣一片心。中朝祇有張司馬。奢家小醜肆跳梁。斬使焚書氣激昂。三戰先登復重慶。兩河扼險守瞿塘。天上丹書褒敵愾。弟姪遷官子宣慰。登壇揮涕感君恩。一家骨肉都華貴。四城翊衛重巖疆。一夜千山獍火光。驛騎星飛馳羽檄。詔書十道促勤王。將軍奉命先諸將。掃境從戎森甲仗。毀家慷慨見孤忠。更罄私財佐軍餉。平臺召見學山呼。多少須眉覺媿無。御製新詩示褒寵。丹青勝畫美人圖。玉帳連營此間駐。號令嚴明嫺節度。振旅重看劍閣銘。留兵仍護凌河戍。祇憂蜀事已披猖。巴圓夔巫盡戰場。空有奇謀上劉邵。頻將苦戰扼羅張。竹籩坪前空壁壘。老將艱難中流矢。鎗急梨花不解圍。全部義軍同日死。峒卒猶堪二萬餘。願教半廩給官糈。庸才不識籌邊計。太息空陳全蜀圖。十三家賊縱橫走。十三隘險誰堪守。督師驅賊果何心。殘疆獨力支孱婦。巾幗蒙恩二十年。弟兄戰死令名全。可憐帝室金甌固。不及兒家石砧堅。請纓遺恨仍逋寇。寶刀戰血胭脂繡。莫將蜚語污貞心。當筵曾裂鴛鴦袖。聖清啓運奠寰中。史局編摩屬鉅公。佳傳一篇名將讀。土司列女可能同。當年曾記瞻遺像。鳳眸玉照天人樣。英雄第一女將軍。惜教未畫雲臺上。仙館開尊賦錦袍。燭花紅照陣雲高。風流最是吳郎句。謂陶雪傳唱揚州譜玉簫。子孫聞徙南昌住。檠戟家聲改韋布。尙留殘軸疊空箱。英姿麗色還如故。板渚磯邊春水生。樓船東下太橫行。至今重過屯兵地。羞說寧南舊姓名。

憶舊

紅闌十二曲。曲曲繞漁磯。水暖鴛鴦浴。花深蛺蝶飛。粧殘收鏡匣。春盡卸簾衣。明月仍相照。空憐舊夢非。

柳如是沉香筆筒

桃葉扁舟憶渡江。玉臺長近畫眉牕。粧成親校詩人集。曾貯湘筠管一雙。也合裴鍾記小名。沉香禪味悅溫馨。眞珠四面泥金字。留得尙書舊日銘。花開紅豆幾番秋。萬軸琳琅過眼收。僥倖彤籤香一握。劫灰曾避絳雲樓。先後才名說善持。滄桑心事兩人知。櫻桃匣底梅花硯。一例新添本事詩。

西湖歸夢詩和錢謝賁吏部

枚

年來踏徧軟塵紅。多少家山付夢中。玉螭橋邊芳草色。金牛湖上落花風。人因客久詩囊富。春盡天涯酒
殘空。舊侶前遊總相憶。西華殘夜雨濛濛。
琅邪大道隱三叉。半走金鞍半鈿車。秋澗白噴龍井雪。春風紅上馬塍花。西泠松柏埋蘇小。南宋樓臺說
趙家。何處酒壚堪貰醉。竹梢輕颺一旗斜。
孤山東面段家橋。細雨斜風蕩畫橈。春色漸添金盞酒。流波初定玉人簫。水痕在扇渾疑濕。花氣薰衣久
不消。曾是當年讌遊地。小樓殘月更無聊。
最憶深宵載月遊。闌干四面水雲浮。醉看星影連天遠。臥聽潮聲入海流。漁浦秋鐙移短簷。藕花涼露滴
閒鷗。池塘夢斷紅棠冷。愁絕湖邊第一樓。

畫橋宛轉出紅闌。面面青山鏡裏看。弔古叢祠悲武穆。繙書高閣話文瀾。尋僧蕭寺衝微雪。餞客吳船倚暮寒。回首斜陽雲樹外。同心雅集後來難。
舊約何堪願屢違。故山煙景最依依。白魚上水晚波滑。黃犢出林春雨肥。蘋葉綠絲牽野艇。桃花紅片點簑衣。西溪大可從漁隱。秋雪庵前好釣磯。
浪跡天涯又幾年。生平山水有前緣。虹橋煙月頻移棹。虎阜鶯花共放船。東嶽仙樓雲作路。西山古寺玉爲泉。若論別緒纏綿地。祇在紅樓夕照邊。
自來北地三年別。不寄西湖一首詩。隱几青山君有約。盟心白水我無期。曉風楊柳聞鶯早。細雨梅花放鶴遲。同是春明羈滯客。各憑歸夢慰相思。

讀吳門女史金纖纖瘦吟樓遺詩

花下簾櫳月下樓。玉臺簪筆亦風流。自憐瘦骨偏宜病。天遣多情祇合愁。鸚鵡綠沉紗幔影。海棠紅冷玉階秋。前身應住瑤清上。偶向人間亦暫遊。
鏤雪團香筆一枝。關心祇有落花知。人因似月留難入。才果如仙謫亦宜。蘭氣化煙春命短。桐陰題夢雨聲遲。論詩也合稱傾國。想見驚鴻絕代姿。
題徧芙蓉夜雨涼。韻紗零落賸餘香。夢爲蝴蝶魂猶瘦。修到鴛鴦命不長。班管墨痕留翠袖。珍珠小字記羅裳。微吟欲下紅粧拜。如此才原未易量。

似把題詩當寫真。臨風如見瘦吟身。可無修竹成佳偶。竟有梅花作替人。小影仙遊憐綽約。秋墳鬼唱最酸辛。蛾眉都有千秋意。肯使遺編付劫塵。楊蕊淵·李紹蘭·家雪蘭·三女士·爲捐金付梓·

寄題秋影樓

省識芳名近十年。書樓仍住板橋邊。千金駿骨憑誰識。絕代蛾眉祇自憐。蓮性藕絲中歲感。蘭因絮果美人禪。年來大有悲秋意。聽到秋心倍惘然。

六月十二日蓉裳農部招集芙蓉山館設祀黃文節公

終南仙館祀玉局。華陰雪照峨嵋綠。廣陵近祀歐陽公。蜀岡花借芙蓉紅。涪翁聲望後先埒。海內何人祀文節。詞壇星斗森光芒。好事復有毘陵楊。名花一枝酒一斗。主賓起舞爲公壽。酌酒勸公晉一卮。賤子再拜前致辭。西江詩派誰所作。似此淵源殊簡略。宋興以來此一人。史臣貢諛知無因。文章萬世公論出。絕後空前一枝筆。不學公詩知愛公。心賞豈與他人同。人生大節在忠孝。落落數公翼名教。更從遺像瞻音容。雙眸炯炯雙頤豐。公生慶歷歲乙酉。來年七百更餘九。

雙劍

雙劍如秋水。何年百鍊鋒。平分幾星斗。靜臥兩蛟龍。霜雪各自愛。風雷都未逢。劇憐皮相者。顏色賞芙蓉。

七夕湘芷招集雲葉舫

絡角銀河澹不收。瑤池高會亦風流。今宵拚愛羣仙笑。乞得相思又乞愁。